

von Wulf Wager

Mobil beim Liebespiel



Ben i froh, dass i ema Alter ben, wo i mi zum Sex nemme emma enga Auto romdrugga muass. Guat, früher war i froh, dass i an Käfer geht han. Aber heit ka i mir des nemme vorstella. Uf jeden Fall han i friehr mei Käferle dort abgestellt, wo mr og'stört war ond i han aufpasst, dass i weder Kupplung noch Handbrems aus Verseha betätige.

Letscht Woch isch en Konstanz am Morga so a Autonümmelerle a bissle bleed ausganga. Do warat zwoi grad so richtig em Gschend,

wo dr Fahrer em Liebesrausch uf d' Kupplung dappt isch. Ond weil dem sei Karra an ra abschüssiga Stell gstanda isch, isch'r zeah Meter rückwärts uf a anders Auto drufgrollt. Erscht wo 's gscheppert hot, hot des Liebespiel a abruptes Ende gfonda. Coitus interruptus automobile - sozusaga. Grundsätzlich isch Sex em Auto net vrbota, solange's net gega die öffentliche Ordnung verstößt ond a Erregung öffentlichen Ärgernisses isch. Solang's bloß a öffentliche Erregung isch ond mr drbei net fährt, isch's koi Problem. Weil aber dia zwoi trotz Frühlingsgefühle zehn Meter gfahra send ond au no en Auffahrunfall verursacht hend, gibt's jetzt a paar Punkte in Flensburg und an Monat Führerscheientzug. Des isch Strof gnuag, denn jetzt hend die zwoi Luschtbolza jo koi mobiles Vergnügungsmobil meh. Obwohl, wenn se net fahrat ...

Bis näggschd Woch'

Ihr

Wulf Wager